

Rau To Yakobus Imbooda

Jems

1 ¹You Yakobus. You mbesooŋa to Maaron ve Tiina toit Yesu Kriŋi. Nambood rau tonene ilat to yam rumai saangul ve ru to Israel to awaghaughau ala aneep irau ndug ndug. Ndag poia pa yam asob.

Ighaze tovaanŋ ivot pait, nene pa ipalot ghurla toit

²Yam toŋvetaz, ighaze tovaanŋ naol naol tivot payam, aghita di tinimale mbeb popoia, ve lolomim poia padi. ³Pasa, yam awatag: Ighaze Maaron itoov ghurla tiam, nene pale ipalot gham, leso ayoon ariana pa badoonŋ pataŋani.^a

⁴Tovenen ayoon ariana ve akis ghurla tiam tunŋia. Pasa, ighaze ŋgar tovene ivot inim tiina ila lolomim, nene pale irau ambool pa ŋgar poia eta maau, ve ŋgar tiam isob deŋia ve popoia moghon ila Maaron mata.

⁵Ighaze tiam eta ikankaan: Pale itaghon sa ataam leso itaghon Maaron ŋgar toni ve ineeŋ pooi? Ye irau ighason Maaron pa igham le ŋgar. Maaron pale igham pani. Irau iyasiil pani maau. Pasa, ye ŋgeu to reiŋ mbeb, ve ighamgham mbeb popoia naol naol pa tamtoŋhon tisob.^b

⁶Eemoghon ye irau isuŋ Maaron toman lolo ee moghon, ve ighur ila ighaze Maaron pale iloonŋ sunuunŋ toni. Lolo ru malep. Pasa, tamtoŋhon to ighaze lolo ru, ye inimale te to yaghur iviviira, ve diboma iparab. ⁷Tamtoŋhon tovene, irau ighur mata pa Maaron igham mbeb eta pani ne maau. ⁸Pasa, ŋgar toni ru. Ye itaghon ataam ee moghon maau. Tauto iwaghamgham.^c

Maaron pale ipakur yes mbolaŋa, ve itatan yes mbaliinŋ taudi

⁹Ighaze toŋvetaz eta to Kriŋi le iza maau, ye irau lolo poia ve tini iza. Pasa, Maaron pale ipakuri.^d

a 1:3 Mt 5:11+; Ro 5:3+; Hib 12:11; 1Pe 1:6+ **b** 1:5 1King 3:9+; Np 2:3+; Mt 7:7
c 1:8 Mk 11:24 **d** 1:9 Yems 2:5

¹⁰Ve yes to mbaliin taudi ne paam, ighaze tighilaal Maaron ve titatan taudi ila mata, nene yes irau lolodi poia ve tinidi iza. Pasa, mala maau pale timaat tinimale kananaj rungu to timalai ve titaptap.^e

¹¹Iit tawatag: Ighaze ndag iza ve ighaaz kananaj rungu, nene pale imalai ve itap izi, ve ghitoonja poia muul maau. Ngjar raraate moghon pale ivot pa yes mbaliin taudi. Pale tighamgham uraat todi ila ila le sawa eta, ghoru timaat ve tisob.^f

Ataam to tovaan

¹²Ighaze tamtoghon eta iyoon ariana pa tovaan to ivotvot pani, ye irau tini iza pa poia to Maaron to pale iza toni. Pasa, ngjar to ye ighami, nene ipatoonja ighaze ghurla toni, nene mbep tau. Tovenen muri, ye pale inep mata iyaryaar. Nepoon tonowen, nene atia to Maaron igham pa yes to tiparab ariana ve tilib pa tovaan to ivot padi. Ye imbua saveen pataghaan wa ighaze pale igham nepoon tonenen pa yes to lolodi inep toni.^g

¹³Ve aloon! Ighaze tamtoghon eta lolo ipazaagha pa ghamuun ngjar samia, nene irau isuk pa Maaron ighaze: “Tovaan tonene, Maaron ighami pa iwat ghou, leso natap ve naghamsosor.” Venen malep. Pasa, Maaron iwat ghiit maau. Ve mbep eta irau iwat Maaron maau. ¹⁴Ngjar samia to inep ila tauud lolood, tauto ipapazaagh ghiit, ve igheghereb ghiit pa ghamuun sosor.^h

¹⁵Nggara tovene: Ighaze ngjar samia ivot ila lolood ve inim tiina, ghoru ipazaagh ghiit ve tagham sosor. Ve ighaze sosor toit ivot inim tiina kat, nene pale igham ghiit tamaat. Nggara inimale ndiliva to apodi. Ndinatudi titubtub ila apodi le sawa todi to popaan ighaze ivot, ghoru tipoop.ⁱ

¹⁶Yam tojvetaz, you lolog payam kat. Matamim imosmoos pooi pa taumim. Pa vene, aghur ila ngjar kaarom ve ipaghau gham pa ataam to Maaron. ¹⁷Sa ngjar ma mbep to paghuna ve poia kat, nene inep sambam ve izi inim. Tamaan Maaron ireireii pait sorok. Ye ghazonja tau, to ighur ndag, kaiyo, ve pitum, leso nggurubadi isul ghiit. Ve itortoor ngjar toni maau. Ye inimale ai yavyaava to ila mala, ve inim tuku ne maau. Ngjar toni inepneep tovene irau sawa isob.^j

¹⁸Tau lolo ighaze igham ghiit tanim ndinatu. Tauto ipaghazonjan ghiit pa saveen onoon, ve igham ghiit tanim paghu. Iit tanimale aniiin mata to tighuri inim Maaron le. Pasa, ye igham ghiit tanim paghu ve tamuun pa mbep naol to ye ighur di.^k

¹⁹Yam tojvetaz, you lolog payam kat. You naghaze aloon saveen tonene ve agham ngjar pani. Iit tasob irau tangin poian avood. Tovenen tapiyaav

e 1:10 Mbo 90:5+, 103:15+; 1Pe 1:24 **f** 1:11 1Yo 2:17 **g** 1:12 2Tim 4:8; 1Pe 5:4; Syg 2:10 **h** 1:14 Mbnp 3:6; Ro 7:7+ **i** 1:15 Ro 6:23 **j** 1:17 Mal 3:6; Mt 7:11; 1Yo 1:5
k 1:18 Yo 1:12+; 1Pe 1:23

saveeŋ rikia malep. Taneep ve talooŋ poian saveeŋ to tamtoghon, ghorō tasaav. Ve ateed yabyab rikrikia malep. ²⁰Pasa, mbalmbali to iit tamtoghon, nene irau igham ŋgar deŋja ivot itaghton Maaron lolo ne maau. ²¹Tovenen ŋgar samia to iŋgalaanŋ ila Maaron mata maau, yam apuli isob ineep. Ve atatan taumim, ve agham saveeŋ toni to ye ivazogi ila lolomim, ve akisi ariana. Pasa, saveeŋ tonowen le tapiri tiina, ve irau igham mulin gham, leso aneep pooi.^l

²²⁻²³Ve alooŋ. Yam irau ataghton Maaron saveeŋ toni. Ighaze alonjloona sorok, ve ataghton maau, yam agham kaarom pa taumim. Ighaze ŋgeu eta igham tovene, nene ye inimale tamtoghon to itiir nagho ila tirooŋ. ²⁴Eemoghon igharaat tau maau, ve imundig ila, ve rikia moghon lolo imaagh pa nagho muul.^m

²⁵Tutuunŋ to Kriŋi, nene poia moghon ve deŋja kat. Nene irau ipas ghiit pa samia tapiri, leso tanim mbesooŋa pani muul sob. Ighaze tamtoghon eta itiir poian tutuunŋ tonowen, ve lolo imaagh pani maau, ve mata kisini ve itaghton, ye pale tini iza pa poia to Maaron to pale iza toni, ve uraat toni ighur pooi.ⁿ

Ŋgar to deŋja kat pa Maaron ŋgar toni

²⁶Ighaze tamtoghon eta mata iŋgal ighaze sujuunŋ toman mbesooŋ toni nene poia, eemoghon iŋgin poian avo maau, ye igham kaarom pa tau. Pasa, mbesooŋ tovene, nene mbeb sorok. Irau iuuli rita maau.^o

²⁷Ve mbesooŋ to le sosor eta ineep ila maau, ve iŋgalaanŋ moghon ila Tamaan Maaron mata, nene vene: Tala taŋgig yes parooŋa ve ndinaara, ve tauul di pa pataŋani todi, ve taneep saguan pa ŋgar samsamia naol to taan to tigham ghiit tasami ila Maaron mata.^p

Mataad izi pa tamtoghon ve taveleg di malep

2 ¹Yam toŋvetaz, yam aghur ila to Tiina toit Yesu Kriŋi aghaze ye iza tiina pa tapiri ve poia toni. Tovenen ighaze yam avool to tamtoghon pida ve apakur di, ve matamim izi pa pida ve aveleg di, nene deŋja maau.

²Saveeŋ tiou tonene, pughu tovene: Agham ŋgar pa tamtoghon ru. Eez, ye mbaliinŋ tau. Nonogiiŋa toni, nene paghuna, ve igharaat tau le poia kat. Ve ite, ye ŋgeu sorok to nonogiiŋa toni mareprepaina. Ighaze tamtoghon ru tovene tilooŋ tila pa lupuuŋ tiam, yam aghamgham tovene: ³Ŋgeu to nonogiiŋa toni paghuna kat, yam apakuri ve asaav pani aghaze: “Olman, unum mbolem izi ndug poia tonene.” Eemoghon ŋgeu mbolaana, yam asaav pani aghaze: “Ai, yom ula uyoon tonowe,” ma “Unum mbolem

l 1:21 Np 17:27; Lu 8:15; Kol 3:8 m 1:24 Mt 7:21,26+; Lu 11:28; Ro 2:13

n 1:25 Mbo 19:7; Yo 13:34+; Ro 8:2; Yems 2:12 o 1:26 Mbo 34:13, 39:1, 141:3; 1Pe 3:10
p 1:27 Mt 25:35+; Ro 12:2; 1Yo 2:15

izi taan to agheg pughu ne.”⁴ Aghita. Iŋgar tovene poia? Maau. Ighaze aŋgabiiz nditamim ve avureer di tovene, yam agham ŋgar samia, ve gabizooŋ tiam deŋia maau.

⁵ Yam toŋvetaz, lolog payam kat. Aloŋ. Yes mbolaŋa to tamtoghon to taan matadi izi padi, nene Maaron isia di tinim le, ve igham di tighur ila toni ariaŋa. Tauto izadi pa ghamuŋ nepooŋ poia toman Maaron izi ndug toni sambam. Ndug tonowen, ye imbua saveeŋ pa yes to lolodi pani ne, ighaze ye pale igham di tila tineep pani.^q

⁶ Eemoghon yam, ghoru agham mayanjiŋa pa yes mbolaŋa. Laak, naghason gham: Sa ndiran to titatan gham, ve tiweuweu gham ala pa savsaveeŋ? Nene yes mbaliŋ taudi. ⁷ Ve Kriŋ iza poia to iza tiam, sei masin to tivevelegi, ve tipipiyaav saveeŋ samsamia pani? Nene yes tonowen. Aghita wa?

⁸ Kinik toit Maaron isavia tutuuŋ toni tiina eez. Ineeŋ ila saveeŋ toni to timbooda. Isaav ighaze:

“Lolom pa tamtoghon ve ugham poian di, inimale lolom pa taum.”^r Ighaze ataghon katin tutuuŋ ee moghon tonene, nene pale agham ŋgar poia.^s

⁹ Eemoghon ighaze avool to tamtoghon pida ve apakur di, ve matamim izi pa pida ve aveleg di, nene yam amalaŋ pa Maaron tutuuŋ toni, ve asosor. ¹⁰ Aloŋ. Ighaze tamtoghon eta itaghon tutuuŋ to naol ne, ve imalaŋ pa ee moghon kat, nene ye le sosor ila Maaron mata raraate inimale tamtoghon to imalaŋ pa tutuuŋ to naol ne.^t

¹¹ Pasa, Maaron ee moghon to isaav ighaze: “Ughur maat malep,” ve isaav paam ighaze: “Urab tamtoghon imaat malep.” Tovenen ighaze yom ughur maat maau, eemoghon urab tamtoghon imaat, tau tonene. Yom umalaŋ pa tutuuŋ wa.^u

¹² Tovenen matamim iŋgal. Saveeŋ tiam toman ŋgar isob to aghami, nene irau itaghon tutuuŋ to Kriŋ. Pasa, tutuuŋ tonowen irau ipas ghiit pa samia tapiri, leso tanim mbesooŋa pani muul sob. Ve sawa to Mboŋ Muri, Maaron pale iŋgabiiz ghiit itaghon tutuuŋ tonenen. ¹³ Tovenen yes to lolodi isamin tamtoghon maau, yes paam, Maaron pale lolo isamin di maau, ve ighur atia iŋarua di pa sosor todi. Eemoghon yes to lolodi isasamin tamtoghon ve tiuluul di, nene pale tinidi iza ve lolodi poia. Pasa, sawa to Maaron iŋgabiiz di, ye pale lolo isamin di, ve ireu sosor todi.^v

Ighaze ghurla toit ipamundigin ghiit pa ghamuŋ ŋgar poia maau, nene imaat wa

¹⁴ Yam toŋvetaz, aghita. Ighaze tamtoghon eta isaav ighaze ye ighur ila to Kriŋ, eemoghon ghurla toni ipamundigini pa ghamuŋ ŋgar poia

q 2:5 Lu 6:20; 1Kor 1:26+ r 2:8 Wkp 19:18 s 2:8 Mt 22:36+; Ro 13:8+; Ga 5:14
t 2:10 Mt 5:19; Ga 3:10 u 2:11 Igham 20:13+; Ro 13:9 v 2:13 Mt 5:7, 18:32+;
Yo 13:34+; Yems 1:25+

maau, nene pale iuuli vena? Maau. Ghurla tovene irau inim ataam pani pa Maaron igham mulini ne maau.^w

¹⁵Laak, ighaze tonjetaz tiam eta ilat, ve ye le nonogiija to monjeaan maau, ve imbool pa aniiij.^x

¹⁶Ve ighaze yam auuli maau, ve ambaanja ila, ve asaav pani aghaze: “Ijgeu tiou, ula toman lolom poia, ve ukaal lem nonogiija eta to monjeaan ve undud ghom pani. Leso umonjeen sob. Ve ughan le apom isuj.” Nene pale saveen tiam tonanan iuuli vena? Maau. ¹⁷Nene raraate moghon pa ghurla toit. Ighaze taghur ila moghon, ve ghurla toit ipamundigin ghiit pa ghamuuj ngar popoia maau, nene imaat wa.

¹⁸You nawatag: Tamtoghon eta pale imundig ve izoor saveen tiou ighaze: “Tamtoghon pida tiyoon arianja pa ataam to ghurla, ve pida tigham ngar ve uraat popoia, lesa tineep denjadi ila Maaron mata.” Eemoghon you pale napamuul saveen tonenen tovene: Ighaze yom ughur ila, eemoghon ughamgham ngar poia maau, nene pale naghilaal ghurla tiom vena? Upatoonja ivot ighazoon, ghoru nawatagi. Pasa, you naghita naghaze ngar popoia to naghamgham di ne, tauto tipatoonj ghurla tiou.

¹⁹Ve yom to usaav ughaze: “You naghur ila naghaze Maaron ee moghon to inepneep.” Saveen tiom poia. Eemoghon avuvu samsamiadi tighur ila tovene paam. Tauto atedi imbumbu, ve matughezaan tiina igham di!^y

²⁰Yom ugham ngar to borouja! Ighaze ughur ila to Maaron, ve ughamgham ngar poia maau, ghurla tiom, nene mbep sorok. Le anonja maau. Vena? Ughaze napaghazonan ghom pa saveen tiou tonene pughu?

²¹Matam injal ngar to muuj timbuud Abaram ighami. Ye ighur natu Isak izala artaal, ve ighaze irabi imaat inim watoonrau. Ijgar toni tonowen, tauto Maaron ighita ighaze ye ngeu denja.^z

²²Ughita wa? Ijgar to Abaram ighami, nene itaghon ghurla toni. Tovenen igham ghurla toni ivot kat ve inim mbep tau. ²³Tauto Maaron aliija waaro eez to timbooda, anonja ivot. Saveen tovene:

“Abaram ighur ila to Maaron. Tauto Maaron ighita ighaze ye ngeu denja.”^a Pughu tonene to tiwaat Abaram tighaze ye Maaron ita ite.^b

²⁴Aghita wa? Ighaze taghur ila moghon, nene iraua maau. Iit irau taghur ila, ve tagham ngar poia itaghon ghurla toit, ghoru taneep denjaad ila Maaron mata.

²⁵Ve agham ngar pa Reap paam. Ye liva to ataam. Eemoghon sawa to Yosua imbaan sandiri pida tila pa tindangat ndug Yeriko, Reap igham di ve injin poian di, le ipaghau di titaghon ataam ite tila. Ijgar to Reap ighami, tauto Maaron ighita ighaze ye inep denja ila mata.^c

w 2:14 Mt 7:21; Yems 1:22+ x 2:15 Lu 3:11; 1Yo 3:17+ y 2:19 Mk 1:24

z 2:21 Mbnp 22:1+; Hib 11:17+ a 2:23 Mbnp 15:6; Ro 4:3 b 2:23 Is 41:8

c 2:25 Yos 2:1+, 6:17,25; Hib 11:31

²⁶Tovenen ighaze tamtoghon eta ighur ila, eemoghon ghurla toni ipamundigini pa ghamuuj ngar poia maau, nene ghurla toni imaat wa. Inimale iit tamtoghon. Ighaze avuvuud isob, nene tamaat.

Iit irau tangin poian avood

3 ¹Yam tonvetaz, tamtoghon tiam katindi tizuaria di pa uraat to patonjaan tamtoghon pa Maaron aliņa malep. Pasa, yam awatag: Iit to tapatoot tamtoghon pa Maaron aliņa, Maaron pale ingabiiz katin ghiit pa gabuaad ve uraat toit. Ve ighaze denjaad maau, ye pale ighur atia pait ilib pa tamtoghon pida.

²Iit tasob tatap ve taghamgham sosor naol naol. Ighaze tamtoghon eta ingin poian avo, ve saveej toni isosor maau, ye pale iraua kat pa ngar popoia to naol ne. Tamtoghon tovene pale irau ingin poian nima, aghe, ve anoņa dodoli isob.^d

³Aghita. Iit taghurghur ain ila hos avo, leso tagham pooz pani ve itaghon ngar toit. Hos, nene mbep tiina. Eemoghon ain kainanen tonowen, nene irau igham pooz pa hos anoņa dodoli. ⁴Waanj tovene paam. Waanj anoņa, nene mbep tiina kat. Ve pooza, nene kainanen. Eemoghon ighaze yaghur iza ve dibom tiwapapun waanj, tamtoghon to ikis pooz kainanen tonowen, ye irau igham pooz pa waanj le ighau denja injarua ndug sine to ye ighaze ila pani. ⁵Ve avood paam. Nene mbep kainanen eez to ineep ila anoņaad. Eemoghon aliņa ve tapiri, nene tiina kat. Ve sawa isob, ipapakur tau pa uraat tintina.^e

Yab ngiliņi rismoghon, nene irau imundig, ve ighan su tiina kat le isob. ⁶Avood, nene raraate inimale yab. Nene anoņaad babanja eez to samia kat. Sawa isob, isasavia saveej samsamia naol itaghon ngar to taan. Tauto igham anoņaad toman lolood, ngar toit, ve gabuaad isob isami ila Maaron mata, ve iwaghamun nepooņaad le isami kat, inimale yab ighan ndug tiina le isob. Pasa, ngar to inim pa Ijgeu Samia ndug toni, tauto ipapamundigin ghiit ve tasesavia saveej samsamia ivotvot ila avood.^f

⁷Iit tamtoghon irau tapamormoran mbep naol naol le matadi mormoria tinim borouņa. Ijgai to su, man, moot, ve mbep to te paam. Nene tamtoghon tipamormoran di le tisob. ⁸Eemoghon tamtoghon eta irau ingin poian tau avo ne maau. Pasa, avood, nene mbep samia kat. Ve ate izizi maau. Sawa isob, isasavia saveej samsamia, ve iwawaghamun nepooj to tamtoghon inimale mbep lili.^g

⁹⁻¹⁰Avood, nene mbep ee moghon. Ve ighamgham uraat ru. Ipapait Tamaan Maaron, ve ipipiyaav saveej samia pa nditaad to Maaron ighur

d 3:2 Mbo 34:13; Mt 12:37; Yems 1:26 e 3:5 Mbo 12:3+, 73:8+ f 3:6 Mk 7:15
g 3:8 Mbo 140:3; Ro 3:13+

di tigham ye tau nagho. Tovenen saveeņ mata ru to ivotvot ila avood, poia ve samia. Yam tonjvetaz, aghita. Ŋgar tovene denja maau.^h

¹¹Vena, te toman ya irau tivot pa taan saambu ee moghon? Maau. ¹²Ve irau ai fik ighur anoņa inimale ai oliv, ma ai vaen ighur anoņa inimale ai fik? Maau. Ma te irau itoora inim ya poia pa ghunuņ? Maau.ⁱ

Maaron, ye ŋgar poia pughu

¹³Ighaze tiam eta ighaze ye le ŋgar poia ve ighazooņ pa Maaron ŋgar toni, ye irau itatan tau, ve igham ŋgar poia pa tamtoghon. Pasa, ŋgar tovene, tauto ipatooņ yes to ledi ŋgar poia.

¹⁴Eemoghon ighaze aghita nditamim to ledi mbeb katindi ve ireu lolomim, ve sawa isob akaal ataam pa atatan di ve agham taumim izamim inim tiina, yam apait taumim aghaze lemim ŋgar tiina malep. Yam agham kaarom pa taumim. Pasa, ŋgar samia to aghamghami, nene itaghon saveeņ onoon to Maaron maau. ¹⁵Ŋgar tovene inim pa ndug sambam maau. Nene ŋgar to taan ve ŋgar to lolood muņgina. Ŋgeu Samia inim pughu pani. ¹⁶Alooņ. Ighaze taghur koi pa nditaad to ledi mbeb katindi, ve sawa isob takaal ataam pa tatatan nditaad ve tagham tauud izaad inim tiina, nene irau mbeb eta ilaan denja maau. Pasa, ŋgar tovene inim pughu pa ŋgar samsamia naol naol.^j

¹⁷Eemoghon ŋgar to ineep sambam ve izi inim, nene igham ghiit tataghon ŋgar ŋgalaņa muuņ. Ghoru igham ghiit talup ghiit tanim ee moghon ve taneep toman lolood luuma, ve tagham pooi pa tamtoghon. Ve igham ghiit tayoon ariņa pa tauud ŋgar toit maau, ve tanim loņlooņ pa nditaad ŋgar todi. Ve igham ghiit lolood isamin tamtoghon kat ve tauul di, ve tapatooņ ŋgar popoia naol naol tinim ghurla toit anoņa, ve tagham ŋgar raraate pa tamtoghon tisob. Ve ŋgar naol tonene, tagham kaarom padi maau. Tagham di toman lolood.^k

¹⁸Yes to tighamgham uraat pa lupuuņ tamtoghon tinim ee moghon, ve tiuluul di leso tineep pooi toman lolodi luuma, yes tinimale tamtoghon to tivazog aniiņ uve popoiadi. Muri, uraat todi tonowen pale ighur anoņa ve ŋgar denja ivot.^l

Taghur lolood pa mbeb to taan malep

4 ¹Pughu vena to ŋoņaņ ve malmal tivotvot ila lolomim? Lolomim igham pa mbeb samsamia naol. Tauto ŋgar naol tonanan tiparab ila lolomim, ve tipazaagh gham pa ghamuuņ ŋgar samsamia.^m

²Yam lolomim igham pa mbeb naol to taan. Eemoghon irau agham di maau. Tauto lolomim irab gham pa nditamim mbeb todi, ve yamņa

h 3:9-10 Mbnp 1:27 **i 3:12** Mt 7:16 **j 3:16** 1Kor 3:3; Ga 5:19+ **k 3:17** Ro 12:9+; 1Pe 1:22; 1Yo 3:18 **l 3:18** Is 32:17; Mt 5:9 **m 4:1** 1Pe 2:11

awakokan gham, ve agham malmal, ve awarabun gham amatmaat. You nasaav payam. Mbeb to lolomim itañ pani, yam irau aghami maau. Pasa, aghason Maaron pani maau. ³Ve ighaze aghason Maaron pa mbeb eta, ye irau igham payam maau. Pasa, ngar tiam denja maau, ve aghasoni pa mbeb soroksorok pa ipambees tinimim moghon.ⁿ

⁴Yam apul murimim pa Maaron animale liva to ipul azuwa ve igham tamoot paghu. Yam awatag maau? Nggar to taghur lolood pa mbeb to taan, nene igham ghiit tanim Maaron koia. Tovenen sei to ighaze ighur lolo pa mbeb to taan, nene inim Maaron koia.^o

⁵Saveeja timbooda pataghaañ tovene:

“Avuvu to Maaron ighuri ila lolood ne, nggar toni iyaryaañ ighaze taghur lolood ve nggar toit isob inarua ye moghon.”^p

Vena, saveeja tonene, yam aghita inimale saveeja sorok?^q

⁶Eemoghon poia to Maaron to izaza toit, nene tiina le tiina kat. Tauto saveeja waaro ite isaav ighaze:

“Yes to tipait taudi izadi, nene Maaron ighurghur koi padi ve itatan di.

Ve yes to titatan taudi izadi, ye ighurghur poia toni izaza todi.”^r

⁷Tovenen atatan taumim ve aneep ila Maaron samba, ve aparab ariana toman Nggeu Samia. Leso ighau payam.^s

⁸Yam ala agharau Maaron, ghoru ye ilat igharau gham. Yam ndiran samsamiamim to ayoon pa ataam ru, apul nggar to taan ineep, ve ataghon nggar to Maaron moghon! Agharaat taumim, lesu lolomim toman nggar tiam ingalaañ moghon ila ye mata.^t

⁹Aniñ ve tinimim iza muul malep. Aghilaal sosor tiam, lolomim ipatajan pani, ve atañ tiina pa taumim.^u

¹⁰Atatan taumim ila Maaron mata. Leso ye tau ipakur gham.^v

Tasavia saveeja samia pa nditaad malep

¹¹Yam tonvetaz, asavia saveeja samia pa nditamim malep. Pasa, tamtoghon to ighaze iveleg ita ite ve ighita ighaze ye ngeu samia, ye iveleg Maaron tutuuñ toni paam, ve ighita tutuuñ tonowen inimale mbeb sorok. Yom sei to ugham tovene, yom uneep ila Maaron tutuuñ toni samba maau, ve utagho ni maau. Yom upakur ghom sorok. Pasa, yom

n 4:3 Mbo 66:18; 1Yo 3:22 **o 4:4** Mt 6:24; Ro 8:7+; 1Yo 2:15 **p 4:5** Saveeja waaro tonene, le ataam naol pa tatoora. Ataam ite, nene vene: “Maaron to ighur Avuvu ila lolood ne, nggar toni iyaryaañ ighaze taghur lolood ve nggar toit isob inarua ye tau moghon.” Ve ataam inim tol pani, nene vene: “Nggar to ineep ila lolood ne, nene ighamgham pa mbeb naol.” Ve ataam inim paañ pani, nene vene: “Maaron ighur Avuvu ineep ila lolood, ve nggar toni iyaryaañ kat ighaze Avuvu tonene inarua ye tau moghon.” **q 4:5** Igham 34:14
r 4:6 Mbo 138:6; Np 3:34; Lu 14:11; 1Pe 5:5+ **s 4:7** Ep 4:27, 6:11+; 1Pe 5:8+
t 4:8 Yems 1:8,27; 1Yo 3:3 **u 4:9** Mt 5:4 **v 4:10** Mt 23:12

ughaze taum unghabiiz tutuunj ve ughita sine to poia pa utaghoni, ve sine to irau upuli.^w

¹²Aloonj. Maaron tau to ighur tutuunj. Ve uraat to gabizoonj tamtoohon, nene ineep ila ye nima. Ye irau igham mulin tamtoohon, ve irau iwaghamun di. Tovenen yom sei, to ughaze unum tiina ve unghabiiz itam ite?^x

Tanumeer tauud malep

¹³Aloonj! Yam to asavsaav aghaze: “Aazne, ma bozo, ghoru niraav nila ndug eta, ve nineep tonowe irau ndaman eez ve niraukol pa lemai mbef. Leso niyou lemai mbef katindi. Le isob, ghoru nimuul ninim.”^y

¹⁴Yam lemim njar maau! Mbef to bozo pale ivot payam, yam awatagi? Maau. Nepoonjamim to taan, nene inimale yab mbuasa to iza, ve mala maau imbiriiis ilale.^z

¹⁵Yam irau asaav tovene: “Ighaze Tiina toit lolo tovene, nene pale taneep ve tagham uraat tonene. Ighaze maau, nene pale maau.”

¹⁶Eemoghon yam asavsaav tovene maau. Yam apapait taumim ve apakur gham sorok pa uraat to aghaze aghami. Njar pakuruunj isob tovene, nene samia kat. ¹⁷Tovenen matamim njar pooi. Pasa, ighaze tamtoohon eta ighilaal njar poia to ye irau itaghoni, eemoghon ighami maau, ye igham sosor.^a

Saveenj injarua yes mbaliinj taudi to titatan yes mbolaanja

5 ¹Yam mbaliinj taudi, aloonj. Lolomim isami ve atanj tiina pa taumim. Pasa, patajani tiina kat ighaze ivot payam tonene.^b

²Mbaliinj tiam naol to andoundou di, nene pale tisami le tisob. Ve nonogiiija tiam popoiadi, up pale injut motmotin di. ³Gol ve silva tiam to asiir iwaghamun di le tisami, nene pale tipatoonj sosor tiam ivot ighazoonj, ve tinim pughu pa Maaron ighur atia injarua gham, ve yab ighan gham. Pasa, aazne, taneep ila sawa to Maaron ipasob uraat toni toman mbef tisob. Eemoghon yam azuarua gham pa ndouj lemim mbaliinj naol naol.^c

⁴Aghita. Yes uraata tiam to tinghamgham uraat pa uum ve tiluplup aniiinj tiam, yam awatombanon di, ve aghol poian di maau. Atia todi pida to atatani izi ineep, toman tanjiiz todi, nene imboboob iza ila pa Maaron Ariaaja To Injin Mbef Tisob, ve iloonja wa. Ve ye pale iyat njar samia to yam agham padi.^d

w 4:11 Mbo 15:3; Mt 7:1+; Lu 6:37; Ro 2:1 x 4:12 Mt 10:28; Ro 14:4 y 4:13 Lu 12:16+
z 4:14 Mbo 39:4+, 144:4 a 4:17 Lu 12:47 b 5:1 Lu 6:24; 1Tim 6:9 c 5:3 Mt 6:19
d 5:4 Lo 24:14+

⁵Nepooŋamim to taan, nene poia le poia kat. Tinimim imbees kat pa mbef to ulimim. Aghan tiina, aghun tiina, ve atub atub le animale ŋgai to sawa igharau pa tiŋgali.^e

⁶Yes ndiran denjadi to ledi sosor eta maau, yam apayoon di pa savsaveeŋ, ve arab di timatmaat. Ve yes tipamuul malmal maau.^f

Tayoon ariana ve tasanjan mulaan to Tiina toit

⁷Tovenen yam toŋvetaz, ayoon ariana pa badoon pataŋani, ve asanjan mulaan to Tiina toit. Agham ŋgar pa yes to tivazog aniin ila uum. Yes tipasul maau. Atedi izi, ve tisanjan ndag ve uman pa igham aniin anoŋa ivot.^g

⁸Yam tovene paam. Atemim izi, ayoon ariana, ve asanjan Tiina toit. Pasa, sawa to mulaan toni, nene inim igharau wa.^h

⁹Ayou avomim pa nditamim malep. Pasa, ighaze agham tovene, Maaron pale iŋgabiiz gham paam ve ighur atia payam. Aghita. Ŋgeu to pale iŋgabiiz ghiit ve ighur atia pait, ye inim iyoon ataam avo wa.ⁱ

¹⁰⁻¹¹Yam toŋvetaz, agham ŋgar pa yes propeta to muun tivotia Maaron aliŋa pa tamtoghon. Onoon, pataŋani naol tivot padi, ve tineep sami. Eemoghon tiyoon ariana, ve timbaad pataŋani naol tonowen. Tauto aazne, tapait di, ve taghita di taghaze Maaron ighur poia toni tiina iza todi. Ŋgar to tighami, nene ipatoon gham pa ŋgar to Maaron ighaze ataghoni. Ve agham ŋgar pa Yop paam. Kamos toni, yam alooŋa wa. Ye paam, pataŋani naol tighami. Eemoghon iyoon ariana pa badoon pataŋani naol tonowen, le irau Maaron iuuli ve nepoon toni poia muul. Ŋgar to Maaron igham pani, nene ipatoon ghiit ighaze Maaron toit, ye lolo isasamin ghiit, ve iuluul ghiit pa pataŋani toit.^j

¹²Yam toŋvetaz, mbef tiina kat to yam irau matamim kisini, nene vene: Ighaze ambua saveeŋ pa uraat ma mbef eta, yam awaat mbef eta to sambam ma taan, ma mbef ite paam iza pa apariaan saveeŋ tiam malep. Ighaze ambua saveeŋ pa agham mbef eta, ghoru asaav moghon aghaze: “Vee, pale naghami.” Ve ighaze lolomim pa aghami maau, ghoru asaav ghazoŋa aghaze: “You irau naghami maau.” Asaav moghon tovene, ve ataghon saveeŋ tiam. Pa vene, agham sosor ve Maaron ighur atia payam.^k

Suunuu to ndiran denjadi, le tapiri tiina

¹³Ighaze tiam eta ineep toman pataŋani, ye irau ighason Maaron pa iuuli. Ve tamtoghon to ighaze ineep poia ve tini iza, ye irau imbou ve ipait Maaron iza.^l

e 5:5 Lu 12:19+, 16:19+ f 5:6 Mt 5:39 g 5:7 Mk 4:26+; Lu 21:19; Hib 10:36+
h 5:8 Ro 13:11+; 1Pe 4:7 i 5:9 1Kor 4:5; Yems 4:11 j 5:10-11 Yop 1:20+, 42:10;
Mbo 103:8; Mt 5:12 k 5:12 Mt 5:33+ l 5:13 Ep 5:19; Pil 4:6; Kol 3:16

¹⁴Ighaze tamtoghon eta imorooŋ, ye irau imbaaŋ pa yes to tiŋgin lupuuŋ to Kriŋi. Leso tinim tiliŋ ŋgoreeŋ izala pogho, ve tighason Maaron pa iuuli.^m

¹⁵Ighaze tisuŋ pa Maaron ve tighur ila tighaze ye irau igharaat tamtoghon tonenen, nene pale Maaron iuuli ve tini poia muul. Ve ighaze tamtoghon tonenen igham sosor eta, nene pale Maaron ireua.ⁿ

¹⁶Tovenen yam avotia sosor tiam pa taumim, ve awaghurun taumim ila suŋuuŋ tiam. Leso Maaron iuul gham ve tinimim popoia. Pasa, suŋuuŋ to tamtoghon derjadi, le tapiri tiina ve ighurghur anoŋa.^o

¹⁷Agham ŋgar pa propet Iliia. Ye tamtoghon raraate inimale iit. Eemoghon sawa to isuŋ ariaŋa ve ighason Maaron pa ipoon uman, Maaron ilooŋ suŋuuŋ toni, ve uman rita izi maau le irau ndaman tol ve alulu.^p

¹⁸Muri ghoru, Iliia isuŋ muul, ve Maaron igham uman izi, ve aniiŋ titub muul.^q

Tapasalunŋan yes to tiyel pa ataam to saveeŋ onoon

¹⁹Yam toŋvetaz, ighaze tamtoghon tiam eta iyel pa ataam to saveeŋ onoon, yam lemim uraat pa apasalunŋani, ve aghami imuul inim itaghon ataam to Maaron.^r

²⁰Yam irau awatag kat tovene: Ighaze tamtoghon eta igham sosor ve iyel pa ataam to saveeŋ onoon, ve tiam eta ighami imuul inim itaghon ataam to Maaron, ye pale igham mulin tamtoghon tonenen anunu pa mateeŋ, ve inim ataam pa Maaron ireu sosor toni isob ilale.^s